



MEMORIA XUSTIFICATIVA DO CONVENIO DE COLABORACIÓN ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA E O CONSELLO XERAL DO PODER XUDICIAL, O MINISTERIO FISCAL E MAIS O COLEXIOS DE AVOGADOS DA CORUÑA PARA A POSTA EN MARCHA DUN PROGRAMA EXPERIMENTAL DE MEDIACIÓN NO ÁMBITO PENAL NA CORUÑA NO ANO 2017

Esta consellería de Presidencia, Administracións Públicas e Xustiza é o órgano da Administración autonómica que ten atribuído o exercicio de competencias en materia xustiza en virtude do artigo 20 do Estatuto de autonomía de Galicia, aprobado pola Lei orgánica 1/1981, do 6 de abril, que se exercen a través da Consellería de Presidencia, Administracións Públicas e Xustiza. É desexo desta Consellería a realización de todas aquelas actuacións coas que poida acadarse a maior eficacia en relación cos temas da Administración de Xustiza en xeral, segundo as funcións que lle atribúe o Decreto 72/2016, do 25 de abril, no que se establece a súa estrutura orgánica.

No mencionado ámbito material, constitúe un dos obxectivos o impulso, a implantación e o desenvolvemento de programas e actuacións de desxudicialización de conflitos e de promoción da mediación, tal e como establece o Decreto 72/2013, do 25 de abril, polo que se establece a estrutura orgánica da Vicepresidencia e da Consellería de Presidencia, Administracións Públicas e Xustiza.

Finalidade: Para os efectos sinalados, tense previsto formalizar co Consello Xeral do Poder Xudicial, o Ministerio Fiscal e o Colexio de Avogados da Coruña o instrumento convencional arriba referido que abrangue dende o 1 de xaneiro ata o 31 de decembro de 2017.

O convenio ten por obxecto establecer as condicións polas que se rexerá a colaboración entre o CXPX, a Vicepresidencia e Consellería de Presidencia, Administracións Públicas e Xustiza e mais O Colexio de Avogados de Coruña para poñer en marcha un programa experimental de mediación no ámbito penal en Coruña. Este proxecto experimental de implementación da mediación intraxudicial nos xulgados de instrución e do penal da Coruña persegue o seguinte:

- Intervir en conflitos xudiciais a través da mediación penal e da xustiza restaurativa como instrumento de resolución pacífica dos mesmos.
- Xerar un espazo para a comunicación entre os cidadáns, pois coa mediación penal poden abordarse as controversias que en ocasións subxacen aos feitos delituosos.
- Posibilitar que a vítima se sinta protagonista tanto do propio procedemento penal coma do xeito de o resolver.
- Darlle unha resposta reparadora e reintegradora á situación que se creou como consecuencia do feito delituoso.
- Establecer mecanismos de colaboración cos operadores xurídicos, nomeadamente coa Fiscalía e mais cos xulgados.

O Colexio de Avogados da Coruña, comprométese a implantar un programa experimental de mediación para o ámbito penal nos xulgados de instrución e do penal da Coruña.





O instrumento convencional que se pretende asinar fundaméntase no seguinte:

A mediación penal consiste na participación voluntaria do imputado por un delito ou falta e mais da vítima –ou persoa prexudicada– nun proceso de diálogo e comunicación conducido por un mediador imparcial, co obxecto fundamental de conseguir a reparación adecuada ao dano causado e a solución do conflito, dende una perspectiva xusta e equilibrada para os intereses das partes. A mediación no ámbito do proceso penal é unha realidade e unha necesidade na sociedade en que vivimos, e ante situacións de grave quebrantamento das normas de convivencia presenta indubidables singularidades que complementan eficazmente o propio sistema penal, proporcionando instrumentos de control e reacción ante o fenómeno criminal.

A mediación penal devén dunha nobre utilización do Código penal con fins de política criminal restaurativa: toma en consideración as causas reais do conflito e as súas consecuencias; responsabiliza o infractor acerca das consecuencias do seu ilícito, ao tempo que diminúe a reprobabilidade penal (atenuante) e lle procura medios para a normalización da súa vida; asegura unha efectiva protección da vítima mediante a reparación ou diminución do dano causado polo delito, de modo que, se non existe vítima, a reparación pode ter un carácter simbólico ante a comunidade social ou organismo que a represente; restablece a vixencia da norma e o diálogo comunitario, reconstruíndo a paz social quebrada polo delito ou falta e minimizando o rigor do sistema penal.

Financiamento: O investimento máximo a que se refire o presente convenio fíxase en DOCE MIL EUROS (12.000,00 €) para o ano 2017, con cargo á aplicación orzamentaria 05.22.131A.481.0 dos orzamentos do ano 2017 da Vicepresidencia e Consellería de Presidencia, Administracións Públicas e Xustiza.

Poderá facerse un primeiro pagamento do 10% da contía total concedida con cargo aos fondos destinados ao mantemento do servizo e divulgación, en concepto de anticipo, unha vez asinado o convenio de colaboración. O resto da contía total concedida, ata alcanzar o 80%, poderá facerse efectivo mediante pagamentos parciais á conta da liquidación definitiva, á medida que a entidade xustifique debidamente os gastos e os pagos realizados.

O 10% restante farase efectivo unha vez presentada pola entidade a documentación final xustificativa do gasto realizado.

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación do texto refundido da Lei de contratos do sector público, aprobado polo Real decreto lexislativo 3/2011, do 14 de novembro, con independencia de que, ao abeiro do previsto no artigo 4.2 da dita norma, lle sexan de aplicación os principios desta lei para resolver as dúbidas e lagoas que se poidan presentar.

Santiago de Compostela, 27 de xuño de 2017

